

中峰明本國師 著

信心銘
闢義解

佛陀教育基金會

印贈

一切佛經，及闡揚佛法諸書，無不令人趨吉避凶，改過遷善。明三世之因果，識本具之佛性。出生死之苦海，生極樂之蓮邦。讀者必須生感恩心，作難遭想。淨手潔案，主敬存誠。如面佛天，如臨師保。則無邊利益，自可親得。若肆無忌憚，任意褻瀆。及固執管見，妄生毀謗，則罪過彌天，苦報無盡。奉勸世人，當遠罪求益，離苦得樂也。

三祖信心銘

至道無難。唯嫌揀擇。但莫憎愛。洞然明白。毫釐有差。天地懸隔。欲得現前。莫存順逆。違順相爭。是爲心病。不識玄旨。徒勞念靜。圓同太虛。無欠無餘。良由取捨。所以不如。莫逐有緣。勿住空忍。一種平懷。泯然自盡。止動歸止。止更彌動。唯滯兩邊。寧知一種。一種不通。兩處失功。遣有沒有。從空背空。多言多慮。轉不相應。絕言絕慮。無處不通。歸根得旨。隨照失宗。須臾返照。勝却前空。前空轉變。皆由妄見。不用求真。唯須息見。二見不住。慎勿追尋。纔有是非。紛然失心。二由一有。一亦莫守。一心不生。萬法無咎。無咎無法。不生不心。

能隨境滅。境逐能沉。境由能境。能由境能。欲知兩段。元是一空。一空同兩。齊含萬象。不見精麤。寧有偏黨。大道體寬。無易無難。小見狐疑。轉急轉遲。執之失度。必入邪路。放之自然。體無去住。任性合道。逍遙絕惱。繫念乖真。昏沉不好。不好勞神。何用疎親。欲取一乘。勿惡六塵。六塵不惡。還同正覺。智者無爲。愚人自縛。法無異法。妄自愛著。將心用心。豈非大錯。迷生寂亂。悟無好惡。一切二邊。良由斟酌。夢幻空花。何勞把握。得失是非。一時放却。眼若不睡。諸夢自除。心若不異。萬法一如。一如體玄。兀爾忘緣。萬法齊觀。歸復自然。泯其所以。不可方比。止動無動。動止無止。兩既不成。一何有爾。究竟窮極。不存軌則。契心平等。所作俱息。狐疑淨盡。正信調直。一切不留。無可記憶。虛明自照。

不勞心力。非思量處。識情難測。真如法界。無他無自。要急相應。惟言不二。不二皆同。無不包容。十方智者。皆入此宗。宗非促延。一念萬年。無在不在。十方目前。極小同大。忘絕境界。極大同小。不見邊表。有即是無。無即是有。若不如此。必不須守。一即一切。一切即一。但能如是。何慮不畢。信心不二。不二信心。言語道斷。非去來今。

天目中峯和尚廣錄卷第十二之上

參學門人北庭臣僧慈寂 上進

信心銘闢義解上

聞夫少林不立文字。直指之道方二傳。而至璨大師。師作信心銘。五百八十四字。得非遽變乃祖之風。而爲文字流布耶。或謂不然。是欲顯示其直指之道。俾後之學者。具正信而破邪惑也。謂信者何。信其廣大心體。與諸佛平等無間。必欲其自信而入。不假修證。一入信位。決定不退轉也。故此銘。與不立文字之說。並驅於千古之下。而不相悖者。益信大師立言之至荷法之誠也。嗟今學者。膠於義解。不能廓悟神心。洞見源底。以資正信。返以是銘爲引證。談柄之張本。其金屑入眼之喻。不能無及於吾大師也。余因繫影于舟。

凡兩句下。申之以語偈。不敢炫耀見聞。仰攀勝軌。誠欲闢義解。顯正悟。曉同志。勵自己也。其有傍不甘者。則余罪過。當何以釋諸。故以信心銘闢義解。標其名焉。

至道無難。唯嫌揀擇。

神光烜赫。萬靈罔測。踞群象之深淵。啓重玄之大宅。臨濟用金剛王。發雷轟霆震之令。望影尤難。德山遣木上座。奮風馳電走之威。追蹤莫及。陶形鑄象。不居其有功。負海擎山。似覺其無力。黃面漢四十九年。有手只好拏空。白拈賊千七百箇。有口惟堪掛壁。最現成。難委悉。擬向當陽指似伊。早是門前起荆棘。

祖師道。至道無難。唯嫌揀擇。義解者。謂此兩句。乃一篇之要綱。一銘之本旨。然信之一言。全該悟證。非信行之信也。如法華之諸子。於會權入實之際。作信解品。以述其懷

。吾祖目之曰至道。唯佛證之曰菩提。衆生昧之曰無明。教中彰之爲本覺。皆一心之異名也。至若徧該名相。涉入色空。異轍殊途。千條萬目。豈乖優劣靡隔悟迷。莫不由斯而著。如趙州之栢樹子。楊岐之金剛圈。密菴之破沙盆。東山之鐵酸餡。異端並起。邪法難扶。則知至道之話行矣。該通事理。融貫古今。說箇無難。早成剩語。然聖凡染淨。極目全真。揀擇情生。迴乖至體。是謂惟嫌揀擇也。下文雖殊。悉稟其意。

闢曰。依稀相似。彷彿不同。且至道二字。任你意解。謂無難之旨。須相應始得。自非心開神悟。妙契冥符。迴絕見知。超出言象者。望無難之旨。不翅天淵。於根境相對。差別互陳。不能當處解脫。擬將箇無難。不揀擇底道理。存乎胸臆。又豈止於認賊爲子矣。故於此不能忘言。偈曰

至道不應嫌揀擇

莫言揀擇墮凡情

快須擲瞎娘生眼

白日挑燈讀此銘

但莫憎愛。洞然明白。

直非松。曲非棘。通非虛空。塞非牆壁。無孔鐵鎚當面擲。
直還松。曲還棘。通還虛空。塞還牆壁。依然野水連天碧。
昨夜南海波斯。捉著西天正賊。待到天明點火看。却是東村
王大伯。

祖師道。但莫憎愛。洞然明白。義解者。謂厭生死。慕涅槃。
。是憎愛。捨煩惱。趣菩提。是憎愛。你但於一切聖凡法中。
。不得存毫髮欣厭之情。則此心自然明白矣。

闢曰。咄。直饒你一切不欣厭。坐斷主人公。殊不知只箇不
欣厭底。已涉憎愛了也。苟非親見祖師立地處。與麼註解。
當得西來意麼。偈曰

似地普擎天普蓋

如燈俱照日俱臨

擬於明白中蹲坐

脚下不知泥水深

毫釐有差。天地懸隔。

有定據。無準則。拈空塞空。以的破的。買石得雲饒。六祖道不會。移花兼蝶至。達磨道不識。只遮兩路葛藤。引起參天荆棘。休荆棘。海神不貴夜明珠。滿把撮來當面擲。

祖師道。毫釐有差。天地懸隔。義解者。謂我此廣大法門。雖曰悟迷無間。你若愛憎揀擇之情。毫釐不盡。則霄壤相去。不勝其遠矣。

闢曰。與麼商量。似則似矣。是則未是何則。直饒你一一無差。塵塵合道。也出他天地懸隔不得。偈曰

說箇無差共有差

俱成捏目起狂花

天懸地隔同今古

擬涉毫釐事似麻

欲得現前。莫存順逆。

兩不雙。一不隻。放去非離。拈來非即。楊岐十載。鑄就金圈。少室九年。覷破鐵壁。古佛未生時。月印千江。大塊已鑿時。風清八極。道順不順。謂逆何逆。掛角羚羊喫鐵鞭。秤鎚捏出黃金汁。

祖師道。欲得現前。莫存順逆。一等義解者。謂祖師到此。話作兩橛。何則。此事本來現前。教誰欲得。教中謂。正性無不通。順逆皆方便。於此若教莫存。却成斷滅去也。不然。蓋祖師。曲爲初心方便委示。似美食不中飽人餐也。

闢曰。低聲低聲。祖師在你脚下。縱饒一踏粉碎。更參三十年。偈曰

欲得現前徒逐妄

不存順逆更乖真

香塗刀割忘分別

亦是空王眼上塵

違順相爭。是爲心病。

是病非心。是心非病。莫將有漏筌籬。喚作舀溪杓柄。非離身。非即身。毘耶厥疾轉深。日面佛。月面佛。馬祖沉痾愈盛。情塵未盡處。使甘露亦殺人。鍼芥相投時。用砒霜能活命。自從海上競傳方。無孔鐵鎚生異證。

祖師道。違順相爭。是爲心病。義解者。謂生死無常是心病。見聞覺知是心病。參禪學道是心病。成佛作祖是心病。會須兩忘違順。雙泯聖凡。萬慮俱捐一道空寂。不假萬金神藥。所謂心病者。自然無地可寄矣。

闕曰。吁。祖庭秋晚。佛法下衰。抱病之流。滔滔皆是。無怪其然。似此知解入心。執藥成病者。使耆婆再世。遇斯等人。亦無所施其巧矣。偈曰

順違相諍心生病

違順俱忘病在心

今古死人常繼踵 謾傳盧扁有神鍼

不識玄旨。徒勞念靜。

盡大地是熱鐵輪。盡大地是大圓鏡。狸奴白牯。今本不迷。彌勒釋迦。昔亦何證。白雲淡蕩兮。非卷非舒。明月去來兮。何動何靜。聚塵沙於法界之圈。陷法界於太虛之窠。只如一人發真歸元。十方虛空悉皆消殞時如何。螭螟吞却須彌盧。胡孫驚出那伽定。

祖師道。不識玄旨。徒勞念靜。義解者。謂玄旨即至道。異名同體。若不識得。豈特念靜。任伊歷恒河沙劫。萬種修證。心外求法。只益自勞。此吾祖之不許也。

闢曰。玄旨如金剛利劍。不識固是喪身失命。識得亦不免傷鋒犯手。且有何方便。能免此過。偈曰

玄旨是誰親識得 釋迦彌勒尚茫然

爲憐滯寂沉空者
獨宿孤峯是幾年

圓同太虛。無欠無餘。

本無欠剩。却有乘除。莊周配萬物爲馬。龍門喚十方作驢。依稀還共轍。彷彿不同途。有水易招空界月。無心難獲夜明珠。

祖師道。圓同太虛。無欠無餘。叢林商量道。此心在聖不加增。在凡不加減。如太虛之圓。各各具足。

闢曰。遮箇說話。脚跨諸方者。坐席未溫。箇箇築一肚皮。惟資談柄耳。及至偶嬰一毫利害。則較得失之念。紛然交接。要教圓同太虛。噬臍何及。當知此事須還妙悟。悟後豈更有第二境。爲對爲待耶。偈曰

螭螟巢結瘦蚊眉
直與鯤鵬接翅飛

若謂太虛無少欠
依前開眼陷重圍

良由取捨。所以不如。

薦福莫。趙州無。雪峯放出南山驚鼻。雲門打殺東海鯉魚。興化赴村齋。向古廟裏驛。卒風暴雨。丹霞燒木佛。却教院主墮眉鬚。疑殺人間幾丈夫。

祖師道。良由取捨。所以不如。義解者。謂此心既如太虛之圓。無相不具。一切皆如。你於染淨法中。瞥生取捨。則不如也。

闢曰。若是真正本色參學上士。見此等說話底人。便與劈面唾。不爲性燥。蓋像龍不足致雨故也。偈曰

取既非如捨不如 是牛誰敢喚爲驢

大千沙界金剛體 也是重栽領下鬚

莫逐有緣。勿住空忍。

萬物芸芸。萬靈蠢蠢。離相離名。有誰不稟。因甚麼少室分

皮分髓。臨濟立主立賓。引得兒孫草裏覓。祖師道。莫逐有緣。勿住空忍。義解者。謂二俱虛幻。擬心執著。取捨紛然。一念不生。常居中道。可爲解脫道人。

闢曰。錯。待汝知是解脫。已落虛幻了也。若是真實悟心之士。有緣空忍。豈在解脫之外哉。偈曰

有緣莫逐還成易

空忍教他勿住難

難易兩頭俱斬斷

祖庭依舊不相干

一種平懷。泯然自盡。

不動道場。無生法忍。皓月照窗扉。清風屈屏枕。有佛處不得住。鐵裹燈心。無佛處急走過。花鋪蜀錦。三千里外摘楊花。十方虛空盡消殞。易商量。難定準。海底泥牛喫鐵鞭。百草頭邊風凜凜。

祖師道。一種平懷。泯然自盡。義解者。謂取捨之情既盡。

聖凡知見無依。自然一切處平常。一切處泯滅。

闢曰。白日青天。莫寐語好。即今眼見色。耳聞聲。喚甚麼作平懷。不平懷。偈曰

泯然盡處事無涯

百草頭邊正眼開

生死涅槃俱捏碎

不知何處著平懷

止動歸止。止更彌動。

曲談名相勞。直說無繁重。曲說且止。如何是直說。張三喫鐵棒。李四忍疼痛。活人入棺材。死人成隊送。觀音失却神通。反被兒童戲弄。直說且止。曲說又作麼生。覺花須向性天栽。佛種宜將心地種。

祖師道。止動歸止。止更彌動。一種義學沙門。謂真心湛然。常住不動。無始流轉。皆由妄見。且動既妄動。止亦妄止。以妄止妄。猶抱薪救焚。祇益其熾矣。引擎法師。謂尋夫

不動之作。豈釋動以求靜。必求靜於諸動。必求靜於諸動。故雖動而常靜。不釋動以求靜。故雖靜而不離動。審如是。則動無動相。靜無靜相。如教中謂。動靜二相。了然不生者。蓋了知動靜皆是妄緣。群妄既消。二相亦遣矣。

闢曰。咄。動是銀山。靜是鐵壁。或未曾一捏粉碎。要教他二相不生。萬里崖州。未爲遠在。偈曰

火焰差容蚊蚋泊

劍鋒寧許赤身挨

少林堂奧無門限

把手相牽孰肯來

惟滯兩邊。寧知一種。

左轉右旋。西沒東涌。突出無孔鐵鎚。打破上牢漆桶。無位真人。把須彌盧一擲。直得虛空藏菩薩。向十字街頭。合掌告言。伏惟珍重。爲甚麼如此。

祖師道。惟滯兩邊。寧知一種。義解者。謂兩邊是動靜二相

。一種是覲體無差。乃釋上二句辭也。當知動靜二邊。妄則俱妄。真則全真。安有二致者哉。

闢曰。低聲低聲。休將閑學解。埋沒祖師心。因爲說。偈曰
是一種兮非一種 是非情盡若爲知

休將雪裏莓苔石

喚作溪邊白鷺鷥

一種不通。兩處失功。

指鹿爲馬。喚瓮作鐘。從來將錯就錯。不礙拏空塞空。破蒲團三箇五箇。撫掌大笑。折拄杖七尺八尺。滿面春風。掃除佛祖病。陵滅少林宗。爐韞年深火政紅。

祖師道。一種不通。兩處失功。一等杜撰禪和道。遮兩句。是結前引後之辭也。謂結前。則顯示一種之真理。謂引後。則深責空有之妄緣也。

闢曰。若真實是箇衲僧。說一種。說兩處。句句歸宗。拍拍

是令。如其不爾。說箇一種。早落窠臼了也。況兩處乎。偈曰

一種由來無地著

二邊何處立功勛

老婆只爲頻叮囑

累及渾家落見聞

遣有沒有。從空背空。

頭正尾正。心空眼空。驀面道著。狹路相逢。趙州栢樹子。紅塵截斷一溪水。東山鐵酸餡。碧落衝開千尺松。大象不遊於兔徑。師王安肯媚狐蹤。

祖師道。遣有沒有。從空背空。有等循言逐句者。謂有乃妄有。由遣之而故沒。空本自空。欲從之而故背。有是空家之有。空是有家之空。空得有而故彰。有得空而乃顯。以其彰故。空全是有。以其顯故。有全是空。互融互攝而不差。相在相入而無損。由是而知。遣之從之。得非徇妄者乎。

闢曰。咬人師子。安肯與逐塊韓盧並轍。依文解義。曾逐塊之不若也。欲望其哮吼返擲。其可得乎。偈曰

只爲桃符釘得高

鬼神白日把門敲

何如三尺茅簷下

雲月溪山伴寂寥

多言多慮。轉不相應。

似水入水。如鏡照鏡。洗得法塵。結成見病。三世諸佛。無家可歸。歷代祖師。何道可證。爲憐沒眼巡官。要與空王算命。夜深翻轉卦盤看。一片虛明冷相映。所以道。多言多慮。轉不相應。

義解者。謂言多去道轉遠。又云神心洞照。聖默爲宗。又引達磨道。外絕諸緣。內心無喘。外絕諸緣。則忘其言。內心無喘。則絕其慮矣。

闢曰。你與麼引證了。還相應也未。若果未。則言語云乎哉

。偈曰

因言顯道道忘言

忘道無言亦妄傳

脱略是非言象外

虛空無口解談禪

絕言絕慮。無處不通。

道吾舞笏。石鞏張弓。西河師子。長沙大蟲。且當時極有餘態。到今朝尚播遺風。逗到祖師門下。直教竄跡潛蹤。何以如此。豈不見道。簸箕量米升渾別。熨斗煎茶銚不同。所以云。絕言絕慮。無處不通。或者依文解義道。絕言則言語道斷。絕慮則心行處滅。言語道斷則寂而照。心行處滅則照而寂。到此如來禪祖師禪。可以一串穿過。又有古人教伊休去歇去。口邊醜生。舌上草出等語。得非是理乎。

闢曰。與麼和會。大似置堅冰於烈火之上。多見其不知量也。若果如其說。則那討祖師來。偈曰

絕慮絕言同木偶

何時成佛永嘉非

聲前未領通玄旨

拈起毛端隔鐵圍

歸根得旨。隨照失宗。

與麼與麼。指西作東。不與麼不與麼。認有爲空。與麼中不與麼。似網兜風。不與麼中却與麼。濕紙將來裹大蟲。何以如此。豈不見道。歸根得旨。隨照失宗。一人巧生卜度道。絕言絕慮是歸根。無處不通是得旨。你若作歸根得旨會。又却隨照失宗矣。然根本無歸。旨亦非得。不了此意。妄自認執。是謂隨照。苟存照之之跡。則佛祖心宗。不勝其失矣。

闢曰。果有此說那。苟或如是。則喚將從上佛祖。來喫閻羅大王鐵棒。何則。爲他歸根得旨來。偈曰

隨照歸根事一同

不須特地展家風

偷心未向機前死 得旨何曾異失宗

須臾返照。勝却前空。

見到行到。宗通說通。揭露人天眼目。剖開佛祖心胸。却物逐物。似異非異。殺人活人。謂同不同。總與一齊生按下。海門夜半日頭紅。

祖師道。須臾返照。勝却前空。一等強說道理者。謂以明暗色空。消歸自己者。是名返照。當知空不自空。因心故空。有不自有。因心故有。離心無空。離心無有。衆生違背自心。妄見空有。而欲從之却之。俱名顛倒。

闢曰。錯下名言。少林門下。覓心了不可得。誰是顛倒者。偈曰

本來非照何勞照 說甚須臾與久長
但見一期超象外 不知二子共亡羊

前空轉變。皆由妄見。

古廟香爐。一條白練直下。超死越生。總是落他方便。從來不信自心迷。却言佛法無靈驗。有靈驗。立地便成佛。入地獄如箭。

祖師道。前空轉變。皆由妄見。義解者。謂有是妄。空亦是妄。空有從緣。變易無定。欲得離妄。二俱排遣。

闢曰。咄。遣則任伊遣。殊不知只箇所遣之妄。能遣之心。俱不離妄。苟不能與遣俱遣。要脫他妄緣。未有休日在。且有何方便。與遣俱遣。偈曰

空何有變變非空 莫把山河著眼中

水底波斯吹石火 金烏飛上海門東

不用求真。惟須息見。

豎起生鐵脊梁。橫按倚天長劍。閑忙靜鬧門頭。總與打成一

片。既精專。復勇健。將謂成佛作祖。不隔一塵。撞著三祖大師。輕輕向伊道。不用求真。惟須息見。好好看方便。一等義學之者。謂見有六十二種。法數具陳。不出斷常二見爲主。求真落斷見。逐妄墮常見。楞嚴謂言妄顯諸真。妄真同二妄。猶非真非真。云何見所見。但能離一切見。全體即真。不用求也。

闢曰。是則固是。且祖師道。惟須息見。且見作麼生息。苟有息之之理。展轉成見矣。偈曰

著意求真真復隱

盡情息見見還生

當門雖不栽荆棘

自是無人有路行

二見不住。慎勿追尋。

鍼頭削鐵。佛面剝金。謂無則一塵不隔。謂有則千聖難尋。天曉不露。夜半平沉。絕對待。離古今。舉世盡知湖海闊。

出門方覺水泥深。

祖師道。二見不住。慎勿追尋。義解者。謂既不住妄。又不住真。和箇不住亦不住。正與麼時。繁興大用。舉必全真。更不假離此別尋也。

闢曰。噫。如此等相似語言。那箇無一肚半肚。只是要近傍他。祖師未得在。偈曰

法法本來無所住

於無所住絕追尋

陽烏昨夜沉西嶺

今日依然上曉林

纔有是非。紛然失心。

根非利鈍。道無淺深。有一句子。非古非今。搆不著底。宴坐大圓鏡智。搆得著底。深入邪見稠林。彌勒釋迦。自知無分。狸奴白牯。忍俊不禁。夜騎鐵馬沉滄海。摸得陳年穴鼻鍼。

祖師道。纔有是非。紛然失心。叢林往往道。盡十方世界。是沙門自己。十方世界。是古佛法身。所以云。撲落非他物。縱橫不是塵。也無是者。也無非者。一一皆是妙明心中流出。

闢曰。如此等說話。叢林喚作平實商量。又喚作轉身句子。莫不引斯二句爲證。古今之下。不知污染幾多淨白田地。故本色道流。斥之爲雜毒。訶之爲狐涎。莫有不甘其魔魅者麼。急須吐却。偈曰

說有是非無是非

重門高啓待誰歸

參天荆棘橫官路

那箇行人不掛衣

二由一有。一亦莫守。

日上月下。天長地久。惟有周金剛不事事。白棒橫拖沿路走。有問祖師西來。若不劈脊便撻。便言合取狗口。引得森羅

萬象。笑眼豁開。阿呵呵笑。須三十年後。

祖師道。二由一有。一亦莫守。義解者。謂纔徇二即昧一。纔守一即生二。當知二是真妄。一是自心。真妄之二既除。自心之一無住。可謂解脫大道也。

闢曰。此等語言。記憶在懷。謂之參學。使德山有棒。未到你喫。閻羅老子手中鐵棒。少你一分不得在。偈曰

一法併教伊莫守 不知莫守未爲貧

何如醉臥花氊上 亂把黃金擲向人

一心不生。萬法無咎。

蘇州有。常州有。六六三十六。七七四十九。菴主豎起拳頭。百丈展開兩手。更兼千七百箇飯袋子。弄出鬼面神頭。鰕跳何曾出得斗。

祖師道。一心不生。萬法無咎。義解者。引他經論道。心生

種種法生。心滅種種法滅。諸法不自生。諸法不自滅。皆自一心所變。一心不生。諸法常住。所以古人謂。鐵牛不怕師子吼。恰似木人見花鳥之說。政類乎此。

闢曰。然則然矣。只如永嘉道。誰無念。誰無生。若實無生無不生。喚取機關木人問。求佛施功早晚成。似乎反是。且不生底是。無不生底是。試定當看。偈曰

萬法本來無過咎 一心何更有生緣

叮嚀固是婆心切 牧笛難教合管絃

無咎無法。不生不心。

太華山非險。滄溟海不深。盧仝月蝕詩。有何難讀。伯牙太古曲。殺有知音。惟有東山暗號子。收來無縫罅。放去卒難尋。攪擾幾多伶俐客。摩毘擦袴到於今。

祖師道。無咎無法。不生不心。義解者。謂此二句返上二句

而言。謂無咎。則萬法自消。不生。則一心自寂。法消心寂。至道之體沖然。不待得而得矣。

闢曰。昔僧問趙州。學人乍入叢林。乞師旨示。州云。喫粥了也未。僧云。喫粥了也。州云。洗鉢盂去。此僧悟去。且道此僧當時。悟無咎耶。悟無法耶。悟不生耶。悟不心耶。試定當看。偈曰

法法只因無咎咎

心心多爲不生生

寒猿夜哭巫山月

客路元來不可行

能隨境滅。境逐能沉。

以一重去一重。路遙知馬力。不以一重去一重。歲久見人心。兩重公案。已展不縮。三千里外。誰是知音。自從立雪人歸後。幾片春雲裏翠岑。

祖師道。能隨境滅。境逐能沉。義解者。遽引永嘉道。境非

智而不了。智非境而不生。智生了境而生。境了智生而了。當知能是一心。境是諸法。能即智之異名。境即法之別號。境滅。則能了之心亦滅。心空。則所現之境亦沉。相即相在。互攝互融。初無間斷。其不了者。目之曰迷。

闢曰。據如所說。謂之了□乎。不惟不了。如飢食鹽。重增其渴耳。偈曰

共知光影因燈現 咸謂波濤仗水興

燈滅水沉波影盡 政堪門外喫烏藤

境由能境。能由境能。

一大藏教。陳年故紙。千七百則。腐爛葛藤。不翅止啼黃葉。何殊日下孤燈。拈過了也。又是一層。脫賺人間幾箇僧。祖師道。境由能境。能由境能。有箇依語生解漢道。境不自境。因能故境。能不自能。由境故能。能仗境而生。境托能

而起。當知生而不生。心外無法。起而非起。法外無心。祖師到此。將一心萬法丸。作箇蜜果子。只要伊笑談一嚙。

闢曰。因逆問之曰。子曾嚙得也未。如其未然。世間還有嚙得者麼。他日異時。吞鐵丸有分在。偈曰

因能生所所生能

能所俱忘生不生

老蚌吸乾鯨海水

珊瑚枝上月三更

欲知兩段。元是一空。

空而不空。兔角杖撐破銀山鐵壁。不空而空。龜毛拂展開明月清風。洞山麻三觔。黏皮綴骨。雲門乾屎橛。滯殼迷封。衲僧面前。放過不可。祖師門下。再犯難容。常教肚裏如鍼刺。拋向洪波白浪中。

祖師道。欲知兩段。元是一空。義解者。商量道。兩段即指前之心法。所言一空。非太虛頑然之空。非小乘斷滅之空。

乃靈覺無相之真空耳。此空是諸佛之源。萬靈之母。無聲無臭。昭昭於群象之前。不有不無。朗朗於諸塵之表者是也。闢曰。是空不應有知。既知不應名空。苟未曾與祖師握手。親到真空之海。言語云乎哉。偈曰

夢中鑷得黃金藏

又跨青鸞上寶臺

盡夜喜歡無著處

天明只落得場歎

一空同兩。齊含萬象。

一句無私。萬靈同仰。遠拍祖肩。清機歷掌。大顛打首座。聚雪埋金。興化罰維那。揚聲止響。惟有石敢當。長年整歲。向百衆人前出一頭。今古無人解稱賞。

祖師道。一空同兩。齊含萬象。義解者。卜度道。心不異法。是一空同兩。法不異心。是齊含萬象。所以古云。見色便見心。無色心不現。又教中謂。森羅及萬象。一法之所印。

故祖師發明於此。

闢曰。講經則許你講。要見祖師意。何異鄭州出曹門。偈曰

一不成單兩不雙
夜深寒月印長江

無邊宇宙光吞盡
又引梅花上矮窗

不見精麤。寧有偏黨。

禪名關。教名網。撈摭三有衆生。及第心空標榜。撞著箇沒
意智漢。掣其標。解其紐。萬目要張不張。百夫欲掌不掌。
無心道者合如斯。豈是人前呈伎倆。所以道。不見精麤。寧
有偏黨。

義解者。謂心法既空。能所俱泯。則生佛體同。悟迷一致。
故引息心銘。謂何貴何賤。何辱何榮。何得何失。何重何輕。
。一道虛寂。萬物齊平。之語爲證。

闢曰。然。證也證得相似。其如證得太殺相似。返不相似矣

。且如何是不相似處。試定當看。偈曰
一喝迅雷難掩耳 蟪蛄負海入蚊眉
泥猪癩狗齊開眼 三世如來總不知
天目中峯和尚廣錄卷第十二之上

天目中峯和尚廣錄卷第十二之中

參學門人北庭臣僧慈寂

上進

信心銘闢義解中

大道體寬。無易無難。

竊得衣盂入手。解道非風旛動。金襴外別有何物。倒却門前刹竿。遮兩箇漢無事討事。瞞人自瞞。本來無縫罅。穿鑿不相干。還相委麼。一回相見一回老。一度風來一度寒。

祖師道。大道體寬。無易無難。義解者道。本來箇事。包日月。含虛空。佛祖不知名。大地載不起。如天普蓋。如地普擎。各各圓成。人人具足。又何難易之可言哉。其所難易者。在人不在法也。肯信自心是佛。即易。不信自心是佛。即難。

闢曰。余則異乎所聞。肯信自心是佛。即難。不信自心是佛。即易。且道。利害在甚麼處。此說且止。只如龐居士道。難難。十石油麻樹上攤。龐婆云。易易。百草頭上祖師意。靈照謂。也不難。也不易。飢來喫飯困來睡。遮裏定奪得他三箇舌頭長短。其難易可一笑而領矣。其或不爾。縱饒你隨語生解。說箇無易無難。正是瞎驢趁大隊。轉脚則無路可行矣。偈曰

攤麻樹上困來睡

祖意惟言百草頭

三箇一般無眼孔

扶籬摸壁幾時休

小見狐疑。轉急轉遲。

轉自己入山河。鐵牛沉巨浸。轉山河歸自己。老象溺深泥。自己山河。一齊拈却。諸方爐鞴。無可設施。有設施。不異空拳嚇小兒。

祖師道。小見狐疑。轉急轉遲。義解者道。一切衆生。自空劫已前。與三世諸佛。同成正覺。初無少欠。此心不了。返墮愚迷。而不知覺。是故諸佛祖。百千方便。道之策之。使之悟入。所以云。爲一大事因緣故。出現於世。乃爲此也。但是學人不信自心是佛。而欲心外別求。故斥之爲小見。當知此心本具。說箇疾得成菩提。已成剩語。何遲速之有耶。闢曰。然則即今喚甚麼作佛。如指點不出。病在於何。偈曰

天豈容伊坐井窺

盡其見量總成疑

翻身跳出虛空外

剔起眉毛已是遲

執之失度。必入邪路。

山無重數。水無重數。善財於彈指聲中。見慈氏尊。樓閣又無重數。無位真人。路見不平。以拄杖攔空一畫。十萬八千。一齊捏聚。却回首高聲唱言。芳草萋萋鸚鵡洲。晴州歷歷

漢陽樹。何以如此。豈不見祖師道。執之失度。必入邪路。近代有等據師位者。見人說。看古人話做工夫。孜孜不捨寸陰。克究己事者。便遽引此二句斥之。謂之執之失度。乃云佛法那有遮箇事。一切見成。何不領取。特地做死模樣作麼。

闢曰。說得也是。但不究其源。殊不知。祖師責其悟後之執。豈不見佛眼云。有一等人騎驢覓驢。又有一等人識得驢了。不肯下驢。正言此等。執其悟理。未能忘念。外存所悟之法。內記能悟之心。古人斥之爲法塵。非之爲見刺。故藥山謂。纔有所重。便成窠臼。皆是責其執悟理者。使悟理不忘。謂實有此事。見法不圓。成外道所計。然迷而求悟則易。已悟欲忘則難。儻不遇真正導師。盲枷瞎棒。深錘痛劄。卒莫之自己也。你還甘此說麼。偈曰

執心未盡花常贅

結使還除果不遙

只就從前邪路上

等閑回首赤條條

放之自然。體無去住。

向上機。末後句。八字打開。兩手分付。連得便行。梅花枝上月三更。提得便去。醉跨紫鸞迎曉霧。不作佛法商量。不作世諦流布。異竟如何。不見祖師道。放之自然。體無去住。

義解者。謂執心既遣。自然任運騰騰。無拘無絆。動若行雲。止如谷神。既無心於彼此。寧有分於去住乎。圓覺謂。居一切時。不起妄念。於諸妄心。亦不息滅。住妄想境。不加了知。於無了知。不辨真實。亦差近矣。凡聖情盡。體露真常。迥絕妄緣。即如如佛。

闢曰。相罵饒你潑水。若是祖師意。饒你和一大藏教吐出。

只成業識茫茫。偈曰

見聞知覺盡皆捐

本不期然却自然

君入西秦我東魯

頂門誰不戴青天

任性合道。逍遙絕惱。

裴相國捧佛。請爲安名。唐莊宗。向中原獲得一寶。君不爲萬乘尊榮之所移。臣不爲百揆機務之所撓。林下衲子。足蹈大方。形棲物表。長年累歲。坐在無事甲中。因甚麼返不能如是之却好。且道以何爲礙。歲歲彫枯般若林。年年增長無明草。

祖師道。任性合道。逍遙絕惱。義解者。謂心空及第之士。性不待任而任。道不待合而合。逍遙。如出岫之雲。絕惱。若行空之月。大圓鏡中。有誰不爾。

闢曰。子不聞佛印和尚云。未悟者。難與言已悟之境。如

生盲之人。與之言天日之清明。彼雖聽而不可辨也。或未能撒雙手於懸崖之下。便以任性合道之說爲證。如飢說食之喻。豈誣人哉。偈曰

任他法性自周流

轉見心王病不瘳

更欲逍遙求合道

鐵鞭三百未經酬

繫念乖真。昏沉不好。

一大藏教。是箇切脚。丈六金身。成一莖草。大雄一喝三日。聾。仰山傾出一栲栳。且此等說話。是瓦礫是珍寶。你若道。是句也掃。非句也掃。正是渾侖吞箇棗。

祖師道。繫念乖真。昏沉不好。義解者。引教中云。心不繫道。亦不結業。是爲得道人也。或引德山。毫釐繫念。三途業因之說爲證。又云體道之士。纔有纖毫凡聖悟迷之情。繫于念慮。則爲凡聖悟迷之見所昏。直須一物不干懷。萬緣俱

蕩盡。始可合他古人見處。

闢曰。莫謗古人好。古人向你道。繫念乖真。只箇一物不干懷。已是繫念了也。偈曰

繫念乖真真不乖

昏沉不好好何來

上牢漆桶連箍脫

戴角披毛入禍胎

不好勞神。何用疎親。

趙州勘破了也。水銀無假。雲門話墮了也。阿魏無真。參禪不靈驗。觸處昧元神。眼中藏見刺。耳裏翳聞塵。咄。果有如是事那。只向伊道。舉眸天外看。誰是出頭人。

祖師道。不好勞神。何用疎親。義解者。謂由繫念便乖真。既乖真即勞神。以勞神必疎親。當知繫念乃疎親之因。疎親即繫念之果。祖師說箇何用。噬臍何及哉。

闢曰。遮一絡索。大似依樣畫貓兒。大概畫得也相似。雖死

鼠不能捕。而況活者乎。苟不真箇向命根下。一刀兩段。徒資其話柄耳。偈曰

既知不好復勞神

役盡精神愈不親

何以三家村裏漢

飽噉高臥契天真

欲取一乘。勿惡六塵。

眼爲光明法身。耳爲音聲法身。鼻乃莊嚴香法身。舌即清淨味法身。身名普覺法身。意號了知法身。總具六千功德。成就一切種智。只如四大分解。百骸潰散之頃。六銀悉歸變滅。且法身。向甚處安著。愁人莫向愁人說。說向愁人愁殺人。

祖師道。欲取一乘。勿惡六塵。義解者。謂一乘即自心之異名。六塵根識十八界。乃自心之別號。安有取一乘。而惡六塵。是猶愛手足。而忘肩背也。當知悟此心。則六塵即一乘。

。迷此心。則一乘皆六塵。裴相國謂。背之則凡。順之則聖。又楞嚴謂。阿難。汝欲識知俱生無明。使汝輪轉生死結根。惟汝六根。更無他物。汝復欲知無上菩提。令汝速證安樂解脫。寂靜妙常。亦汝六根。更非他物。

闢曰。和會得也相似。你還知一乘是妄。六塵是謗。捨此二途。還免得妄與謗也無。偈曰

色聲香味與觸法

六處從來契一乘

取捨之情猶未瞥

又於平地起稜層

六塵不惡。還同正覺。

主人翁。諾諾諾。有路不行。無繩自縛。謂六塵即是。徹底乖真。謂六塵即非。還成大錯。錯不錯。一莖草現黃金軀。倒騎萬里冲霄鶴。

祖師道。六塵不惡。還同正覺。義解者。謂也無六塵。也無

正覺。總只是箇妙明心地。喚作六塵也得。喚作正覺也得。你若於此妙明心地。有所不了。喚作六塵也不了。喚作正覺也不了。別有甚麼事。只箇了不了。引得他佛祖。口嘮舌沸。分出許多優劣。都是自不丈夫。而使之然也。

闢曰。昔有一秀才。因累舉不第。乃焚棄筆硯。作一篇歸田詩。譏誚功名如涕唾。及至明年開選。依前走在場屋中。可與作是說者併案。偈曰

不惡六塵同正覺 少林堂奧隔天涯

會須伸出擎空手 佛與衆生一窖埋

智者無爲。愚人自縛。

移嶽盈壑。續鳧截鶴。莊周自謂。說得盛水不漏。點檢將來。政是較短量長。自生卜度。惟有木上座。也無好。也無惡。也無是。也無錯。通身只麼黑黻黻。長年靠在繩牀角。

祖師道。智者無爲。愚人自縛。義解者。謂智不自智。由悟而智。愚不自愚。因迷而愚。智者悟自心。心悟本無爲。愚人迷自心。心迷還自縛。當知悟者之無爲。雖天地鬼神。莫能使之爲。迷者之自縛。雖千聖萬賢。莫能釋其縛。惟智與愚。悉由心變。豈外物使之然乎。

闢曰。但見錐頭利不見鑿頭方。何則。須知無爲即自縛。自縛即無爲。若謂果有二途。則蹉過祖師遠矣。偈曰

愚人自縛還須解 智者無爲縛殺人

寸刃不施俱截斷 爲憐平地喪天真

法無異法。妄自愛著。

通身是病。通身是藥。擬議不來。當面諱却。藥即是病。病即是藥。太虛空裏筋斗易翻。青州做領布衫難著。也無病。也無藥。森羅萬象鐵渾侖。楊岐驢子。三隻脚。

祖師道。法無異法妄自愛著。義解者。謂青青翠竹。盡是真如。鬱鬱黃花。無非般若。盡微塵法界海內。所有聲色。於中覓一同相不可得。覓一異相亦不可得。離此同異。俱不可得。嗟乎。不了此者。著佛被佛礙。著法被法礙。且著佛法。尚且遭其窒礙。降此以往。又何愛著。而不窒礙者哉。闢曰。法若有異法。愛著則有異。法既無異法。愛著亦無異。因甚麼却道妄自愛著。遮裏看祖師不破。前說皆戲論耳。

偈曰

法無異致體還同

同體如何展化功

少室九年惟面壁

不知將底播真風

將心用心。豈非大錯。

心心心。難摸索。釋迦老子。四十九年。說偏說圓。分半分滿。詮註不成。末上拈一枝花。正是將心用心。難免人道箇

。豈非大錯。到此既是事不獲已。且將箇正法眼藏。涅槃妙心。與伊遮蓋却。

義解者道。你要成佛。是將心用心。要作祖。是將心用心。乃至要超生死。住涅槃。證菩提。斷煩惱等。總不出箇將心用心。

闢曰。雖然。也只道得一半。當知心體廣大。不可限量。直下如大火聚。嬰之則燒。觸之則燎。縱饒你不要成佛作祖等。亦出他箇將心用心不得。偈曰

即佛是心心是佛
擬承當處早乖疎
飲光眉向花前展
平地無端起範模

迷生寂亂。悟無好惡。

迷時迷悟底。諾。悟時悟迷底。諾。迷悟兩俱忘。打破靈龜殼。龜殼既破。迷悟亦空。且道遮兩箇諾。向甚處安著。打

瓦與敲甄。一任伊卜度。

祖師道。迷生寂亂。悟無好惡。義解者。謂真寂體中。一切不留。楞嚴謂。無漏真淨。云何是中更容他物。以其未悟此理。面前。不見寂。便見亂。不見動。便見靜。不知動也是迷。亂也是迷。靜也是迷。寂也是迷。乃至見自己立地成佛亦是迷。能了此迷心當處解脫。則一天真。一一明妙。既不見亂。亦不知寂。二邊捨離中道不立。安有好惡之情。復爲障爲礙者哉。

闢曰。此說差近矣。且道迷從何來。悟從何起。遮裏知得來處起處。不待遣迷。只箇悟底。亦無地可寄矣。如其不爾。且把迷底悟底。取性分別究竟。惟增見病耳。偈曰

古今天地誰曾悟
無悟何曾更有迷

翻憶溫州老真覺
無端一宿憇曹溪

一切二邊。良由斟酌。

開口道著。動步踏著。一切總見成。不信且行脚。待伊行到路途窮。雲水空。布衫穿。草鞋薄。那時驀鼻拽回頭。始信從來自擔閣。

祖師道。一切二邊。良由斟酌。或有箇杜撰巡官注解道。纔見有亂。便見有寂。當知亂不自亂。因寂故亂。寂不自寂。因亂故寂。由是諸法紛然。未有不相對相待而起。所云斟酌二字。便是最初謂。揀擇之說差近也。以其揀擇之識未消。則於寂亂等二邊。動成斟酌之念。以其未遣。則一切不得不二矣。

闢曰。然則斟酌之念。有何方便而遣。苟或不知此方便。則爾所說。亦未嘗不由斟酌而生。偈曰

二邊不用頻斟酌 一道齊平亦妄傳

觀體未超言象外 見同佛祖政堪憐

夢幻空花。何勞把捉。

烏龜殼。空索索。鐵秤錘。實曝曝。惟有木上座。不受人穿鑿。朝騎陝府牛。暮跨揚州鶴。有時白日走歸家。敲打虛空自酬酢。還鄉一曲聲未消。天岸雲飛星斗落。

祖師道。夢幻空花。何勞把捉。義解者。引教中道。一切有爲法。如夢幻泡影。如露亦如電。應作如是觀。又引永嘉道。放四大。莫把捉。寂滅性中隨飲啄。諸行無常一切空。即是如來大圓覺。便乃肆情所緣。任意所作。至若毀犯禁戒。破壞律儀。一以此二語爲證。

闢曰。但不知正當肆情任意。放逸自恣之時。果見諸緣境。如夢幻空花也無。若也見是空花。則不應馳逐。胸中微存一念攀緣馳逐之心。則不得爲夢幻空花矣。當知成佛作祖。亦

是夢幻空花。自此已降。又何往而非夢幻哉。更須知道。只箇不勞把捉之說。早是墮他夢幻了也。此事若不親證實到。只欲隨語生解。非愚而何。偈曰

雪山午夜觀星處

業鏡臺前照影時

一種做成顛倒夢

不知誰是得便宜

得失是非。一時放却。

雪峯鞞木毬。普化搖鐵鐸。雖曰大用大機。究竟還成造作。爭似無生國裏王太博。也不善。也不惡。取性飽食高眠。任意逍遙快樂。有人來叩祖師禪。但教問取黃幡綽。

祖師道。得失是非。一時放却。義解者道。一法界中。也無得者。也無失者。也無是者。也無非者。良由妄情瞥起。異見橫生。於無得失中。熾然得失。於無是非處。紛然是非。所以祖師教伊。一時放却。已是傷鋒犯手。平地風波。你還知本來既

無。放箇甚麼。若曰有可放之理。則得失是非。向甚麼安著。闢曰。咄。說有可放。也合喫棒。說無可放。也合喫棒。何則。爲你脫他得失是非未得在。偈曰

兩手撒開無一事

是非得失盡皆捐

擬將遮箇超生死

脚下騰蛇正繞纏

眼若不睡。諸夢自除。

長年屈膝坐。竟日嘴盧都。兩眼掛空壁。莫知何所圖。叩已而參。半疑半信。閱古人話。似有似無。逗到年窮歲盡。翻成緣木求魚。何以從空都潑撒。滿懷突出夜明珠。

祖師道。眼若不睡。諸夢自除。義解者。謂此二句是前喻後合。如人大張兩目。歷歷不昧。則昏住自遣。既不昏住。安有夢緣。

闢曰。若作喻說則可。使其不作喻。祖師亦合喫棒。何則

且開眼何曾不是夢來。偈曰

金剛正眼何曾睡 大夢須知沒覺時

寄語祖師門下客 休將鶴唳當鶯啼

心若不異。萬法一如。

道人行處。如火消冰。衲僧面前。似冰消火。拈却兩重冰炭。放他凡聖同途。無手道士畫神符。瞎眼闍黎讀梵書。更有一般堪信處。螻蛄吞却洞庭湖。

祖師道。心若不異。萬法一如。義解者。謂萬法本如。由心乃異。譬如山不自高。心異故高。水不自深。心異故深。此心異。則千差競起萬別橫生。項背俱身。視之不殊楚越。弟兄同氣。目之何啻天淵。以其異故。至近之情尚爾。欲其混聖凡。齊物我。一自他等憎愛。其可得乎。教中亦云。未達境惟心。起種種分別。類群盲之摸象。猶廣客之疑蛇。於無

同異中。熾然同異。何當揭開翳眼之膜。剪空亂意之絲。融法界歸此心。如鏡照鏡。轉山河入自己。似空合空。到此。諸緣寂爾。萬慮悄然。二見不生。一法印定。可謂遠符祖令。深契佛心者。

闢曰。此說且止。即今明暗通塞。壞空成住。諸境攪然。且喚甚麼。作不異底心。直下指點不出。或有箇道。任他諸法前陳。我但一以此不異之理照之。吁。審如是。則不勝其異矣。偈曰

心不異兮同萬法

空拳惟把小兒欺

擬教依樣描將去

脫賺平人沒了時

一如體玄。兀爾忘緣。

禪禪禪。離言詮。釋迦老子未得一半。達磨大師猶欠八千。臨濟喝得口破。德山棒得手穿。一一從頭點檢。殊覺地遠天

懸。近前。類撥波求火。退後。若掘地覓天。不前不後求相應。更著重參三十年。

祖師道。一如體玄。兀爾忘緣。義解者。謂一如之體玄之又玄。非因緣而有。非自然而成。離四句。絕百非。雖佛眼莫窺。聖心罔測。擲大千於方外。卷法界於毫端。一空一切空。不加宰割。一有一切有。豈用栽培。塵沙不得喻其多。毫髮不可方其少。可謂忘緣絕待。一如之玄體也。

闢曰。說也說得近。你若蘊此說於方寸。要與一如玄體相應。正不異抱火於懷。求其不燒。偈曰

一如如外更何如
重疊溪山隱故廬

睡到三竿紅日上
笑看潘閬倒騎驢

萬法齊觀。歸復自然。

佛法不遺方寸。禪道豈離中邊。你若起心求覓。又還十萬八

千。有何三要。也沒三玄。通身無影像。覲體離言詮。道人安用求相應。今古何曾不現前。

祖師道。萬法齊觀歸復自然。義解者。引他教家。謂隨緣故。真如是萬法。不變故。萬法是真如。又云更無心外法。能與心爲緣。皆是自心生。還與心爲相。

此說似祖師萬法齊觀之理。不相遠矣。或云謂齊觀。亦是不揀擇底影子。苟存揀擇。則不能齊觀矣。

闢曰。引證則不無。且日上月下。夜暗晝明。煥然不可混。作麼生說箇齊觀底道理。離却語言。請露箇消息來。偈曰

萬法如何類得齊

那堪歸復自然時

知音自是從來少

徒把黃金鑄子期

泯其所以。不可方比。

殿裏底。牆外底。打車打牛。豎拳豎指。雪峯輓三箇木毬。

玄沙封三張白紙。靈山說性說心。少室分皮分髓。曹洞列五位君臣。馮仰會一門父子。吟哦滿目青山。指點門前湖水。放行。光蔽五天。捏住。風馳萬里。聲前不許停機。句外豈容插嘴。咄。總是開眼尿牀。燒香引鬼。何以祖師道。泯其所以。不可方比。義解者。謂般若經以一百喻。喻般若。他經中以一百喻。喻解脫。或又以一百喻。喻菩提心。具在典章。安有不可方比之理。當知般若解脫菩提。則可喻。使去却一切名相。與一心俱泯。正與麼時。還立得箇甚麼喻子。或者謂古人道。鷺鷥立雪非同色。明月蘆花不似他。此說豈非不可方比者乎。

闢曰。你擬向白雪蘆花中覓。不翅認溫州橘皮作火。偈曰

方之兔角長三尺 比較龜毛短一分

却有一般渾廝稱 眼睛難見耳難聞

止動無動。動止無止。

萬車同轍。萬事同理。萬器同金。萬波同水。萬象森羅。完全是。你若不信。多買草鞋。向釋迦達磨肚裏。走百千遭。却來依舊從頭起。

祖師道。止動無動。動止無止。義解者。謂祖師老婆心切。將箇止動二邊。輓作一團。與伊說破。與肇法師即靜而動。即動而靜之旨。大率同途。亦是萬法齊觀之旨趣。豈特動止然。蓋一切境緣亦皆如故。即止是動。落花還是春風送。即動是止。堅冰有日全歸水。達人大觀本無差。昧者由斯顛倒起。

闢曰。且置是說。只如亦不作動。亦不作止。正與麼時。還有商量分也無。速道。速道。偈曰

動時塵起靜冰生

把手相牽入火坑

象體自來無蓋覆 苦哉顛倒是群盲

兩既不成。一何有爾。

佛海有涯。禪河無底。尺水丈波。源源不已。馬大師教龐居士。一口吸盡西江。法眼道。是曹源一滴水。更兼船子釣盡煙波。帶累他許由。來洗從前是非耳。大浸稽天。瀰漫萬里。當時不解塞其源。至今平地波濤起。

祖師道。兩既不成。一何有爾。義解者道。是無非不是非無是不非。纔見有是。兀存其非。纔見有非。先存其是。所以單是不立獨并不存。非乃是之根。是乃非之本。至若真妄悟迷等。與之同然。且是非之兩既去。中道之一何存。祖師到此可謂披肝剖心。老婆太過。

闢曰。然兩既不成。一亦無有。還有知不成無有者麼。若謂無。誰知不成無有者。若謂有喚作無有得麼。祖師到遮裏。

也只得結舌有分。偈曰

不放春歸春自歸

園林處處綠成畦

萬紅千紫知何處

剩得一雙蝴蝶飛

天目中峯和尚廣錄卷第十二之中

天目中峯和尚廣錄卷十二之下

參學門人北庭臣僧慈寂 上進

信心銘闢義解下

究竟窮極。不存軌則。

十尺爲丈。十寸爲尺。此說東至日出。西至日沒。盡塵沙國土內。徧問諸人。那箇不能委悉。因甚說著祖師禪。箇箇面前如鐵壁。更有一箇最分曉底。末後句不暇囊藏。盡與一齊拈出。是甚麼。屈屈屈。

祖師道。究竟窮極。不存軌則。義解者。謂盡十方世界所有虛空色象大小纖洪。皆是箇自己。信步行。不離祖翁田地。信口道。總是古佛真詮。以至抱妻罵釋迦。醉酒打彌勒。俱成一行三昧。說甚麼開遮持犯等。故永嘉亦云。大悟不拘於

小節。

闢曰。且住且住。說也說得太殺明白。只是閻羅大王。要捉此等說底來喫鐵棒。且道利害在甚麼處。各自歸家點檢看。
偈曰

信手拈來信口談

縱橫放肆總司南

不存軌則如留念

動輒依前落二三

契心平等。所作俱息。

象王回顧。師子返躑。真不掩偽。曲不藏直。惟有陳如尊者。
。長年宴坐松龕。也惺惺。也寂寂。也不管你小盡二十九。
大盡三十。夜來及第心空。透過參天荆棘。閒於隴外豁雙眸。
。一樹寒梅花摘索。
祖師道。契心平等。所作俱息。義解者。引教中道。是法平等。
。無有高下。譬如水銀墮地。大者大圓。小者小圓。盡大

地更無有一法不與自心相應者。如來成道時。回觀積生多劫。所修行業。皆如夢幻。亦無作者。亦無不作者。所以云。修習空花梵行。宴坐水月道場。降伏鏡裏魔軍。成就夢中佛事。良由此心未了。於平等中。見不平等。以其不平等。則一切所作。由是而興焉。

闢曰。圓覺云。性自平等。無平等者。說箇平等。便合喫三十拄杖。更引出許多知解。轉見不平等也。偈曰

罷問程途撒手歸 一菴高臥對晴暉

百千玄妙俱忘卻 整日無人扣竹扉

狐疑淨盡。正信調直。

牛是一頭。狗是一隻。貓是一箇。馬是一匹。見火知燒。見水知濕。緣何一點自心。箇箇昧如黑漆。疑上加疑。執上重增執。不須疑。也休執。誰知萬別與千差。一切聖賢從此

入。

祖師道。狐疑淨盡。正信調直。義解者。謂信有二種。一正信。二邪信。信自心是佛。不假外求。是正信。不信自心是佛。起心外馳。任有宏爲。皆名邪信。當知正信亦有疑。於正信中未由證得。所以致疑。疑念益深。久遠不退。忽爾洞明。一念開朗。是謂大疑之下。必有大悟。當知悟是信之果。信是悟之因。肇法師謂果不俱因。因因成果。審如是。則信時即是悟時。悟時不異信時。祖師之銘目之曰信心。正類此也。當知大根器之士。一聞舉起。如獲舊物。了然於心。雖衣食可忘。性命可捨。欲其斯須去其正信。不可得也。故古云。假使熱鐵輪。於我頂上旋。終不以此苦。退失菩提心。其正信之念。果如此之堅密。安有不獲親證者哉。捨此則。自餘邪信生疑。疑之不已。則倒見橫生。馳逐妄緣。流入

無閒者必矣。

闢曰。是則是。只如信即悟。悟乃混入靈源。靈源既入。遮箇信字。向甚處安著。若謂別有著處。請指出看。若謂別無著處。則祖師亦成剩語矣。偈曰

信根不正起狐疑

疑念冰消信自持

說得宛然相似了

祖庭何翅隔天涯

一切不留。無可記憶。

大心如天寬。大智如杲日。大疑如火聚。大法如鐵壁。臨濟盡力喝不退。德山盡棒打不息。深深一箇葛藤樁。引蔓牽枝無了畢。就中有箇漢出來道。昨夜被我和根拔出了也。葛藤樁子既拔在手。擬向甚處安著。聲前句外不知歸。轉於平地添狼藉。

祖師道。一切不留。無可記憶。義解者。謂心行處滅。一切

不留。言語道斷。無可記憶。外無法可捨。一切不留。內無心可爲。無可記憶。了了見無一物。亦無人。亦無佛。大千沙界海中漚。一切聖賢如電拂。是謂一切不留。南臺靜坐一爐香。終日凝然萬慮忘。不是息心除妄想。都緣無事可思量。是謂無可記憶。

闢曰。然引證得也相似。任你廣將佛祖言教。引證得盛水不漏。惟是記憶。不勝其多矣。欲得一切不留。其可得乎。偈曰

一切不留還有見 了無可記尚存知

故家田地非親到 畫餅何曾療得飢

虛明自照。不勞心力。

爲道務日損。爲學務日益。損到見謝執亡。益至填胸塞臆。忽然損益兩俱忘。撒手歸來面空壁。池陽城裏王老師。冷地

令人苦相憶。休相憶。虛明自照非心力。

祖師與麼道。義解者。謂彌滿清淨。中不容他。是謂虛。驪珠獨耀。桂輪孤朗。是謂明。既虛而明。物來斯鑑。自照之功。不容有言。遮裏加一毫心力。則不得爲虛明自照矣。

闢曰。然引喻甚當其理。爾見虛空無相貌麼。但未聞虛空自言我無相貌。使虛空能言。則不得爲虛空。使祖師早知此喻。則駟不及舌之咎。終難免矣。偈曰

輪王一顆黃金印 須是當陽正受時

暗地捨來無用處 那堪穴隙去傍窺

非思量處。識情難測。

雪裏粉易分。識即惟心。墨中煤難辨。惟心即識。是識非心。是心非識。明鏡臺前別醜妍。杲日光中觀黑白。怎麼說話。大似箇講惟識論底法師。衲僧面前。如何露箇消息。不是

心。不是識。夜犬吠花村。春鶯啼柳陌。長鯨吸乾海底波。蒼龍走入無生國。驚起大梵王。直上色究竟天頂。把虛空一擲。撒下千顆驪頷珠。閃閃神光射衣裊。

祖師道。非思量處。識情難測。義解者。謂識是心家之識。心是識家之心。此二者如水乳難辨。當知識是水。心是水中之乳。所以敎家謂鵝王擇乳寧同鴨類。但是水中皆有乳。惟鵝王能辨。自餘水族皆莫之知。喻一切識中皆具真心。惟佛祖能了。靈知鑑覺之謂心。思惟憶持分別取捨等之謂識。然識有八種。六根具六。第七名末那。第八名阿賴耶。亦名如來藏。上七識爲枝葉。惟第八識爲根本。敎中謂來爲先鋒。去爲殿後。悟爲如來藏。迷爲阿賴耶。此識在迷。則任持無量劫來捨身受身一切善惡無記等業。在悟。則能任持無始時來一切菩提解脫諸智慧種。此識自迷入悟。轉爲大圓鏡智。

改名不改體也。即今於四大五蘊諸聖凡法中。了了記憶。作用分別。至若見聞覺知。三有紛然。萬法昇沉。一念起滅。莫不皆依之而生。所以云。萬法惟識。圭峯云。生法本無。一切惟識。嗟今之學者。不能向命根下一斬兩段。脚踏叢林。惟以聰明之資。引起情識。覽諸玄解。記憶在心。驀爾觸發。不知是情識依通面然。剛執此是神悟。或妄認目前昭昭靈靈舉口動舌爲自己。而楞嚴謂棄百千大海認一漚爲全潮。圓覺謂皆是六塵妄想緣氣。非實心體。長沙和尚謂學道之人不識真。只爲從來認識神。永嘉謂損法財。滅功德。莫不由斯心意識等。乃佛乃祖。靡不指陳。而末法中此病益加熾盛。然墮此病者。亦因根本學道之志不真不正而然。若是根本志決。欲要與生死岸頭相應。終不肯向此識情中躲跟。良由最初一念。只欲會禪會道會佛會法。況此識如千仞鐵圍。無

始時來把伊圍繞。又如千兵萬騎。晝夜在六根門頭。伺其閒隙。苟不具決定要了生死之志。則無所往而不入之矣。且祖師作信心銘。誠欲展開堂奧。俾後之學者。脫去情識。惟信自心。轉步涉入。儻學者一毫情識不盡。使祖師此銘俱爲毒藥。其利害有如此者。不見最初兩句道。至道無難。惟嫌揀擇。只遮兩句。將心與識判然分解。煥如黑白。何則。謂至道無難。即是指此真心。惟嫌揀擇。即是破此情識。莫有情識不忘者。見此說乃云。我只不揀擇。殊不知即此不揀擇。早是情識作解。而況步步涉有。觸境生情者乎。蓋祖師此銘。前後之意。重拈再指。原其本懷。特不過曲爲學者揀辨其心與識耳。所以云。非思量處。識情難測。

闢曰。據云。惟嫌揀擇。今則於一心法中指出情識。是揀擇耶。非揀擇耶。然情之與識。與一心果異耶。果同耶。真實

道流。於此不能定當。要見祖師銘信心之旨。不亦邈乎。偈
曰

非思量處情難測

學佛玄徒合共知

直下不知欠甚麼

又來開眼被人欺

真如法界。無他無自。

師曠無耳。至神無體。靈源無底。達磨安得有所謂相傳之髓。
。從前共住不知名。今日相逢且非你。月娟娟而萬水不沉。
風泠泠而六窻自啓。不是心不是佛。爛葛藤引蔓於空劫之前。
。非風動。非旛動。死枯骸吐氣於碓坊之底。靈鑑昭昭我不
知。雲月溪山自相委。

祖師道。真如法界。無他無自。義解者。謂真如法界。是一
心之總名。心外無別法。安有自他之稱。謂不特自他之立
。乃至山河大地有情無情。俱不可得而爲有。雖曰不可得而

有。亦不妨自他物象熾然安立。何則。真如法界喻金。自他物象喻瓶盤釵釧。當知金是實體。瓶盤釵釧等器是權名。以實就權。則自他物象。不妨安住。會權歸實。則惟見一真法界之至體。自餘瓶盤之假名。不待遣而自泯矣。昧者將謂祖師不達圓融之旨。宛然斷滅。墮在偏空。作無他無自之說。茲不容不辯。

闕曰。辯則辯矣。且真如法界中。還容得此辯麼。偈曰

內無自己外無他 一箇渾侖花木瓜

驀直向人人不委 依前撒土又拋沙

要急相應。惟言不二。

性喻曰海。心方以地。廣涵而不逾。普擎而弗墜。不可得而涯岸。容受十虛。罔知所以邊疆。貫通三際。前不落。後不昧。野狐精完全兩枚。昨日定。今不定。乾屎橛渾侖一塊。

毘耶窮衆士之辯。口似鼓椎。曼殊逞七佛之師。舌如劒利。我宗無此葛藤。至理有何碑記。海闊全消萬派聲。嶽高頓落千峯勢。

祖師道。要急相應。惟言不二。其義解者。謂祖師重費分疏。首則言惟嫌揀擇。其中閒若一亦莫守。萬法齊觀。萬法一如等。盡是惟言不二之意。然諸佛衆生。覲體不二。說箇成佛。早是剩語。惟是要急相應。似話作兩橛矣。使果有箇相應不相應之理。則宛然成二。特於此未嘗無疑。

闢曰。但恐此疑不真不切。不深不固。若然。則異日此疑。當有自破之時。此疑若破。其相應不相應之二與不二。了之於機先。領之於言外。則知祖師恩大難酬。昔毘耶老人。命衆菩薩。各說入不二法門。各各說竟。及至被衆菩薩。返其所問而問之。則默然不加對。時文殊即伸讚歎。謂真入不二

法門。且文殊何所見而興此讚之之辭。若將此默爲不二法門。則世之病瘖者亦合得不二法門與夫機關木偶等。俱可入不二法門。然默既可爲不二法門。則語亦可爲不二法門。以至謳歌戲笑。皆名不二。何乃獨讚毘耶爲得耶。遮裏親見毘耶文殊二大士鍼芥相投之旨。則相應不相應之說。亦可一笑而釋矣。偈曰

祖翁門戶絕支離

石火電光猶是遲

要急相應言不二

老婆嚼飯餒嬰兒

不二皆同。無不包容。

祖祖心空。佛佛道同。心空則衆星拱北。道同則萬水朝東。興化昨日赴村齋。吾道一貫。德山今夜不荅話。公案兩重。擒虎兇。辨蛇龍。不費海神些子力。驅雷霆。走雲霧。消得龍王多少風。細鍼削鐵。壓沉大地。單絲絞水。浸爛虛空。

無把柄。絕羅籠。禪河自是無船渡。隔壁何曾有路通。
祖師道。不二皆同。無不包容。一等循朱填墨之士。謂法華
云。惟此一事實。餘二則非真。又云。一切諸佛。惟一佛乘
。無二無三。所云一者。即妙圓明心。體離修證。豎該三際
。橫貫十虛。色空明暗以之爲源。凡聖悟迷即之爲本。乃至
盡塵沙法界。見有一毫不依之而生者。皆外道所計。所以云
。森羅及萬象。一法之所印。其不二皆同無不包容之說。不
能外於此也。

闢曰。審如是說。一切言教。已嘗具載。又用他祖師西來作
麼。須知言教。如趙昌之畫花。其高低向背濃淡開合。煥然
可觀。但非真花耳。苟未能向脚跟下如斬一握絲。一斬一齊
斷。而不二皆同之旨。烏可以口出耳入爲得哉。偈曰

黃金鑄就雄雞卵

擊碎依前又鶻倫

裏許不知包甚麼 孤光長夜照乾坤

十方智者。皆入此宗。

至神無功。至體混融。如鐘在簾。耳畔非響非寂。如春發榮。枝上自白自紅。洞山五君臣。朱絲奏一畫未形之韻。臨濟四照用。鐵鞭追萬靈罔測之風。玉轉珠回兮。機先路活。風飛雷厲兮。頂門眼空。思惟不及。快便難逢。差排古佛離窠臼。斷送生蛇化活龍。

祖師道。十方智者。皆入此宗。義解者。引華嚴云。如來真境界。其量等虛空。一切衆生入。其實無所入。又圓覺謂諸能入者。有諸能入。非覺入故。當知此宗。一切衆生本來深入。安有復入之理。衆生既爾。其有智者。不應反有所謂入也。聞永明知尚謂心真如門。初無離在。但迷者喻出。悟者喻入。特迷悟相閒。豈果有所謂出入哉。

闢曰。且止是說。你還曾悟麼。待你真實有箇悟處。方見祖師言不欺矣。偈曰

盡說此宗難得妙

十方智者若爲論

懸崖未解拋雙手

撞入無非地獄門

宗非促延。一念萬年。

乾爲天。坤爲地。禪不異教。陽爲奇。陰爲偶。教豈離禪。只爲互生十度。引起騰蛇繞纏。一箇專一心三觀。一箇重直指單傳。默如山隔。語若天懸。被箇無面目漢。路見不平。攔空一喝。直得達磨大師。與天台賢首。吞聲飲氣。垂手入廬。各家自掃門前雪。不把無明潤識田。

祖師道。宗非促延。一念萬年。義解者。謂祖師指一心爲宗。一心法界中。以劫爲日不加促。以日爲劫不加延。所以視一念爲萬年。轉萬年爲一念。不長不短。非少非多。豈神通

使然。乃法如是故。

闢曰。昔儒之達者。以齊彭殤爲妄作。一死生爲虛誕。使其知有一念萬年之說。猶增驚愕。無他。蓋真俗不同途也。古人亦云。談真則逆俗。順俗則違真。豈不然乎。何當使其裂開俗網。斬斷塵根。回觀吾祖短長相即圓常自在之機。則失言之咎。其可逃哉。雖然。且不涉短長。試道一句看。偈曰

刹那萬劫非延促 不把虛空較短長

便與麼時還諦當 且歸門外錯商量

無在不在。十方目前。

鏡清六刮。濟北三玄。天龍伸瘦指。菴主豎空拳。有佛處。不得住。抹過西乾與東土。無佛處。急走過。打著南邊動北邊。一狀領過。六戶悄然。開門放出揚州鶴。不用腰纏十萬錢。

祖師道。無在不在。十方目前。或者以意識卜度。謂心非色像。道絕方隅。即色像而不妨處處分身。倚方隅而豈礙塵塵露影。塵塵露影。不離當處常湛然。處處分身。覓即知君不可見。是謂無在不在。十方目前之旨明矣。

闢曰。作是說者。偷光望影。也少伊一分不得。若不能親下手剖破藩籬。望他祖師無在不在之旨。何異鄭州出曹門。偈曰

不離當處是何物

逼塞四維含十虛

拋向目前無蓋覆

直教覷著眼睛枯

極小同大。忘絕境界。

投子言壞。大隨不壞。墮此兩重關。觸途成障礙。無障礙。但將兩句併作一處看。便見微塵不小。虛空不大。見成公案絕覆藏。漆桶何緣能不快。

祖師道。極小同大。忘絕境界。義解者道。前云無在不在。便是極小同大。極大同小之標題。故楞嚴謂於一毛端。現寶王刹。坐微塵裏。轉大法輪。苟不達無在不在之旨。則動爲境界所囿。既囿於境界。則安有忘絕之理。既不能忘絕境界。則大者大相。小者小相。安能融攝於一體者哉。

闢曰。只如忘絕境界底人。還見大小也無。若謂見。則未能忘絕。若謂不見。則去土木偶人無幾矣。試道看。偈曰

須彌納芥人皆委

芥納須彌佛也疑

縱使見超情量外

刻舟求劍不勝遲

極大同小。不見邊表。

得得非得。了了何了。心地花開雪谷春。性天日出冰壺曉。不萌枝上。金鳳翱翔。無影樹邊。玉象圍繞。百丈脫野狐胎。貧恨一身多。文殊出女子定。富嫌千口少。但知隔山見煙

。誰問出門是草。一切見成。不用尋討。縱饒靴裏弄鉗鎚。也是門前打之繞。

祖師道。極大同小。不見邊表。一等。義解者。謂昔毘耶大士。運不思議解脫神力。以三萬二千師子座。置之方方一丈室中。室不加窄。座不加隘。然後以右手斷取妙喜世界。普告大衆。彼世不搖動。此世不改變。以大入小。以小入大。互即互融。非彼非此。經中欲說此不思議解脫神力。窮劫不盡。然此神力。無一毫不自妙明心中流出。或者謂。我今亦嘗悟此妙明心體。緣何於此神力而不克證。有以對或者曰。當知此神力。本自具足。不加復證。其所未獲現前者。蓋初心入道。於定慧解脫之力未圓滿故。雖未圓滿。於本覺心中亦不曾失。但時至自現耳。雖曰時至。亦不得存一念待時之心。苟存此待時之心。即落異見矣。譬如初生孩子。未離襁

。祿。而欲其負重致遠。其可得乎。雖不能負重致遠。而於負重致遠。亦何畏何疑耳。雖不獲其現前。其真實有所悟明者。聞此神力。自然不驚不畏。不惑不疑。若有一毫驚畏疑惑之心。存乎胸中。則於此心。實未曾真正悟明者矣。近世行脚高士。不求正悟。惟貴言通。況居師位者。多是取順。一時不肯與之深挑痛剔。彼此徇妄。皆不丈夫。至使般若叢林。掃地無幾。嗚呼惜哉。其有志者。能刻苦勵行。以大悟是期。則報佛深恩。莫加於此。蓋吾佛亦未嘗不備言今日之弊。謂末世衆生。希望成道。無令求悟。惟益多聞。增長我見。雖二千餘載相去。其說如示諸掌。益見聖人之言不我誣矣。

。闢曰。住住。你將謂悟了便休。直饒你超證不思議解脫神力。於一刹那將毘耶老人命根一捏粉碎。苟未能忘其所證。坐

在神異中。政好來喫衲僧痛棒。偈曰

小大悟迷俱屏跡 百千神用頓忘時

衲僧狹路相逢處 棒折須知未放伊

有即是無。無即是有。

半夜子。雞鳴丑。石女深裁無縫衣。木人痛飲菩提酒。晡時申。日入酉。雪山深處象王行。大火聚中師子吼。十二時辰不要數盡。三十年後有人分割。無無無不無。有有有何有。喚作竹篋則觸。不喚作竹篋則背。弄花香滿衣。你有主杖子。我與你主杖子。掬水月在手。我宗不立階差。何用強分妍醜。一塵起三昧。諸塵入正受。珊瑚樹下鬪金雞。蒼蘆花閒眠玉狗。

祖師道。有即是無。無即是有。其義解者。謂有不自有。有是無家之有。無不自無。無是有家之無。有不單居。無不獨

立。且人之言有者。胸中先存所見之無。然後乃云其有。苟胸中先不存其無。安肯於無所對中突然言有。故知無不無即是。有。有不有即是無。有無之理。本乎一源。於一源中。言有則多其有。言無則剩其無。有無混融。言路亦絕。是謂還源之旨矣。

闢曰。雖然。若不奮起大志。泯有無之二於正悟之域。其起心分別。安有忘言之日哉。偈曰

無中現有有還無 此物應難入畫圖

笑老趙州忘管帶 強言東壁掛葫蘆

若不如此。必不須守。

孤山愛種梅。彭澤惟栽柳。一般素養高懷。二處各存窠臼。爭似箇沒意智漢。向無陰陽地上插一莖草。直教花開煦日之前。果熟清霜之後。你等諸人。終日竟夜於其間。俯仰折旋

還見麼。見則切忌眼花。未見不得亂走。

祖師道。若不如此。必不須守。其義解者。謂此是祖師叮嚀囑累之辭。謂真實要與妙精明心本覺靈源一念相應。直須與如上所說一念契同。苟不如是。其雄談闊辯。皆外道所計。守之奚益哉。或者謂若不如此者。乃決定要人契悟其真心也。必不須守者。乃指其不求正悟。惟泥此言說爲得者之意也。此說亦通。

闢曰。然如二說。苟不能忘軀畢命。誓期大成。一報俄消。則吾事失矣。特不知學者。於夢幻影中。何所恃而不加鞭策者哉。偈曰

有無情盡色空忘

白日青天賊獻賊

賤比黃金貴如土

爲憐無地可埋藏

一即一切。一切即一。

二五是十。二五亦七。在人領會。法無固必。喚衆生作諸佛。體亦何差。喚諸佛作衆生。理不曾失。忽有箇漢出來道。衆生自衆生。諸佛自諸佛。何混濫聖凡。令他釋迦老人平地受屈。只向他道。無始妄流轉。莫不由斯執。定性凡夫聖所訶。千手大悲推不出。

祖師道。一即一切。一切即一。或者引教中謂一是一切之一。一切是一之一切。在一不少。在一切不多。此是心法互徧。一多含容。非神通使然。乃法理如是。然此說具在典章。不須廣引。只益言繁。無補於道。當知吾祖作是銘。至不二皆同無不包容處。恐後之學者。不達融會之理。首以延促相即。次以大小相即。又次以有無相即。今復以一多相即。以無邊世界海。融爲不二法門。廣闢於象之淵。大啓於衆靈之府。俾後學不動步而到。不隔塵而入。不加功而成。不克念

而證。大慈之願既周。大化之功普矣。

闢曰。雖然。其如按圖索馬者。日益繁多。何當捩轉面門。與祖師一齊趕退。始解知恩報恩。苟或未然。曳尾靈龜。不能無及於祖師矣。偈曰

大地撮來如粒米 當陽打鼓大家看

眼中若未除金屑 要辨玄黃也大難

但能如是。何慮不畢。

大心無依。大化無跡。大巧無作。大任無力。萬法全彰處。光滅影沉。一毫不露時。山堆嶽積。白蟻鑽開鐵佛心。青蠅踏斷金牛脊。趙州看你放不下。偃溪便從遮裏入。信手拈來。和聲吐出豈智可知。非識能識。幾人覷著眼睛枯。不是克家徒點額。

祖師道。但能如是。何慮不畢。義解者。謂法華云。吾今爲

汝保任此事。終不虛也。即祖師但能如何慮不畢之意。乃爲學者保任之辭也。其策勵勸進之誠。盡見于此。

闢曰。雖然是伊果如是也。未即應聲。點首三下。已遲八刻。稍加佇思。劒去久矣。偈曰

如是如是復如是 要問畢時那裏泊

捋下重重鐵面皮 家鄉猶隔三千里

信心不二。不二信心。

心是根。法是塵。兩種猶如鏡上痕。永嘉大師道。則太殺道。要開鑿人天眼目。如隔海在。何不道。心非根。法非塵。共轉如來正法輪。忽有箇人道。永嘉道底如隔海。你與麼道如海隔。爭似三祖大師。信心不二。不二信心。遮兩句。如生鐵秤鎚。要且穿鑿不破。只向伊道低聲低聲。啼得血流無用處。不如緘口過殘春。

或者以義解祖師意。謂衆生迷此心者。其來久矣。於一法中妄生分別。一一分別。莫不皆二。且見己爲自。必見人爲他。此謂自他之二。從此引起無量無數分別。不勝其二矣。豈算數譬喻而知其涯量者哉。故祖師老婆太過。單提箇信心不二不二信心之正印。與之當頭一印印破。如網舉網。無一目而不張。如領提衣。無一縷而不順。迅雷起乎幽蟄。杲日麗於昏衢。瞽者視。聵者聞。窮者通。愚者智不離夢宅。遠登真覺之場。匪隔幻身。直證金剛之體可謂起死回生之神藥。革凡入聖之良導。至矣美矣。

闢曰。讚歎且止。只如神悟之頃。此箇不二之說。還有容受處也無。苟無地可容。且祖師到此。也合喫棒。偈曰

凡聖悟迷俱不二 了知元自信心生

心非生滅誰迷悟 開眼無端入火坑

言語道斷。非去來今。

心心非心。非心心而非心。非心而心。提起頭拽不斷。放下手卒難尋。此等葛藤自二千年外起乎西土。其閒四七二三。以至千七百箇鈍漢。萬種施爲。剿除不盡。牽枝引蔓。直到于今。幻出煨聖鎔凡鑪。化成吟風弄月叢林。俄二見之蜂起。資異證以交侵。發藥既衆。受病尤深。而況雜邪外之毒。無處著膏肓之鍼。今日且作死馬醫去也。良久云。機前三點活。言外一鉤沉。

其義解者。謂既是言語道斷。此一篇銘非剩而何。若曰非去來今。乃知祖師面目見在。

闢曰。且莫謬加穿鑿取笑傍觀。殊不知理本圓融。道無離在。言語道斷。廣長舌其說熾然。非去來今。淨法身恆常寂爾。毒藥醍醐。攪成一器。黃金瓦礫。輒作一團。用處無差。

拈來有準。一踏到底者。不留朕跡。三搭不回底。謾自搏量。誠一代之聖師。乃百世之標準。敲出鳳凰髓。資異饌於禪悅之門。抽出師子筋。絕餘響於至靈之府。雖然。且道祖師還肯受此等茶飯也無。收起葛藤。一任貶剝。偈曰

熱椀晝鳴翻古調

瞎驢夜吼換新腔

語言道斷道不斷

一任傍人錯較量

非文非字。無佛無心。拏空塞空以毒攻毒。璨大師歎案既在。少林宗聲價不衰。何妨讀作信心銘。切忌記他元字脚。黑漆桶攔空撲碎。玉麒麟就地勒回。揣盡古佛家私。瞎却當人正眼。且道靈驗在那一句。

天目中峯和尚廣錄卷第十二之下

普為出資及讀誦受持
輾轉流通者回向偈曰

願以此功德
消除宿現業
增長諸福慧
圓成勝善根
所有刀兵劫
及與饑饉等
悉皆盡滅除
人各習禮讓
讀誦受持人
輾轉流通者
現眷咸安樂
先亡獲超昇
風雨常調順
人民悉康寧
法界諸合識
同證無上道

佛曆二五五八年/西元二〇一四年六月

信心銘闡義解

發行人：簡豐文

出版者：財團法人佛陀教育基金會

地址：100 台北市杭州南路一段五十五號十一樓

網址：<http://www.budaedu.org>

E-mail：budaedu@budaedu.org

電話：(02) 2395-1198 傳真：(02) 2391-1345

劃撥戶名：財團法人佛陀教育基金會 郵局劃撥帳號：〇七六九九七七

銀行名稱：台灣銀行城中分行（請於電匯或轉帳後告知本會用途）

銀行帳號：〇四五〇〇四五九七五〇三

本會經書免費結緣之請取方式如下：

(一) 親臨本會三樓講堂。(二) 利用傳真：(02) 2395959

(三) 撥打電話：(02) 23951198 分機：11、12

(四) 網址：<http://www.budaedu.org/books/>。(五) 寫信指定：本會法寶流通股。

為提高服務效率，請您嚴謹考量，慎選所需經書；儘量少用電話，多利用文字方式請取，並請詳寫經書名稱、冊數及收件人姓名、地址、電話、郵遞區號，以減少本會之處理時間；若大量申請，請註明用途，且避免姓名、地址等文字上書寫之錯誤。

◎本會經書，歡迎翻印（請勿增刪），贈送流通，功德無量。

◎本會交通：

※捷運：善導寺站5號出口，至杭州南路右轉，過兩個紅綠燈。

※公車站牌：審計部站→212、299、232、205、276、605、257、262

台北商業技術學院→253、297、237 仁愛路二段→253、297 開南商工→208

仁愛路、杭州南路(紹興街)口→630、270、263、245、621、651、37、261

行政院新聞局出版事業登記證局版臺業字第三八六九號



恭印：一〇〇〇本

流水號：12387
書號：CH883-05